


<b>Dreuchd:</b>	Manaidsear Foghlaim (Fòrladh Màthaireil)	 <b>Bòrd na Gàidhlig</b>
<b>Tuarastal:</b>	B3 (Tuarastal £41,642 - £49,860) Pro rata	
<b>Stèidhichte:</b>	Sùbailte	
<b>Uairean obrach:</b>	Pàirt-ùine (30 san t-seachdain)	
<b>Fo stiùir:</b>	Stiùiriche Foghlam na Gàidhlig	
<b>Fo ur stiùir:</b>	Oifigear Leasachaidh Foghlam	
<b>Cùmhnant:</b>	9 mìosan aig a' char as lugha	

### Adhbhar na h-obrach

Mar mhanaidsear aig àrd-ìre, bidh tuigse mhath agaibh air cùisean poilitigeach, foghlaim, sòisealta agus deamografach a tha a' toirt buaidh air obair Bhòrd na Gàidhlig agus ar buidhnean compàirteachas, agus bidh e comasach dhuibh obrachadh gu h-èifeachdach còmhla ri prìomh oifigearan poileasaidh is obrach aig na buidhnean le ùidh no com-pàirt san obair againn. Bidh sibh ag obair gu dlùth còmhla ri Sgioba Stiùiridh Bhòrd na Gàidhlig gus dèanamh cinnteach gun tèid dleastanasan reachdail, àrd-amas agus ro-innleachdan a' Bhùird a choileanadh agus bheir sibh taic do Stiùiriche Foghlam na Gàidhlig gus dèanamh cinnteach gun tèid na Prìomhachasan Ionnsachaidh ann am Planaichean Corporra is Gnìomh Bhòrd na Gàidhlig a thoirt gu buil.

### Prìomh Dhleastanasan

- A' toirt comhairle don Bhòrd Stiùiridh, don Cheannard agus luchd-obrach eile, a' gabhail a-steach nan nithean a leanas: pàipearan fiosrachaidh, Bùird is Comataidh, freagairtean do cho-chomhairleachaidhean, iarrtasan fo Achd an Fhoghlaim (Alba) 2016, an Stiùireadh Reachdail airson Foghlam Gàidhlig agus cùisean co-cheangailte ri foghlam Gàidhlig (0-18) agus ionnsachadh do dh'inbhich.
- A' toirt taic is stiùireadh do sgioba an fhoghlaim gus an urrainn dhaibh obrachadh gu h-èifeachdach ann a bhith a' coileanadh nan dleastanasan aca.
- A' riochdachadh Bhòrd na Gàidhlig sna meadhanan, ann am fòraman poblach agus aig coinneamhan ro-innleachdail.
- Ann an co-bhuinn ris an Stiùiriche Planadh Cànan is Leasachaidhean Coimhearsnachd, bidh sibh ag ullachadh bhuidheatan airson Ionnsachaidh (a' gabhail a-steach maoineachadh airson nan Tràth-bhliadhnaichean, Ciad-fhoghlam Luchd-teagaisg agus CPD), a' stiùireadh mar a thèid an cosg agus a' dèanamh cinnteach gun tèid deagh rian a chumail air leithid a mhaoineachadh.

## Prìomh Chinn-uidhe is Uallaichean

- A' cuideachadh le bhith a' dealbh agus a' coileanadh Planaichean Corporra is Gnìomh a' Bhùird agus a' dèanamh cinnteach gun tèid na prìomhachasan is gnìomhan co-cheangailte ri Ionnsachadh a thoirt gu buil gu h-èifeachdach agus gun tèid sùil a chumail air mar a thèid an coileanadh.
- Ag ullachadh phoileasaidhean ionnsachaidh, le stiùireadh bho Stiùiriche Foghlam na Gàidhlig a thaobh sin, a bheir taic do mar a thèid Plana Corporra a' Bhùird a chur an gnìomh.
- Bidh sibh nur manaidsèar ann an sgioba an fhoghlaim, agus am measg ur dleastanasan san dreuchd sin bidh sibh a' toirt stiùireadh do na Oifigear Leasachaidh, agus sibh a' cumail sùil air na h-ìrean-coileanaidh aca nan obair, agus a' dèanamh cinnteach gu bheil an obair aca a' cuideachadh le bhith a' coileanadh cinn-uidhe na buidhne.
- A' cuideachadh le bhith a' sgrùdadh coileanadh a' Phlana Cànain Nàiseanta Ghàidhlig as ùire agus sibh a' dèanamh cinnteach gu bheil na pàirtean den Phlana Cànain Nàiseanta Ghàidhlig a bhuineas ri foghlam freagarrach, agus gu bheil iad a' gabhail ealla ris na prìomhachasan a chaidh aontachadh leis a' Bhòrd.
- A' toirt taic do mar a thèid Planaichean Gàidhlig ullachadh agus do mar a nithear sgrùdadh air coileanadh nam Planaichean sin a thaobh chùisean Ionnsachaidh.
- Ag obair còmhla ri luchd-compàirt is luchd-ùidhe gus taic a thoirt do cho-obrachadh èifeachdach.
- Bidh sibh a' riochdachadh Bhòrd na Gàidhlig ann am fòraman foghlaim agus sna meadhanan, agus sibh a' dèanamh an fheum as motha as urrainn dhuibh de chothroman conaltraidh taobh a-muigh is taobh a-staigh na buidhne.
- A' dèanamh ath-sgrùdadh gu cunbhalach air slatan-tomhais nan sgeamaichean maoinichaidh feuch a bheil iad fhathast freagarrach agus airson dèanamh cinnteach gu bheil na slatan-tomhais a' toirt taic iomchaidh do mar a thèid Plana Corporra a' Bhùird a choileanadh.
- A' conaltradh ri Ùghdarrasan Ionadail agus buidhnean eile a tha an sàs ann am foghlam tron Ghàidhlig agus foghlam luchd-ionnsachaidh na Gàidhlig gus taic a chumail ri bhith a' toirt leasachadh is leudachadh air na raointean foghlaim sin.
- A' dèanamh cinnteach gun tèid na pròiseactan foghlaim a chuireas sgioba an fhoghlaim air adhart a thoirt gu buil, agus mar phàirt de sin nithear cinnteach gun tèid cumail ri pròiseasan ionmhasail.
- A' dèanamh cinnteach gu bheil ro-innleachdan foghlaim a' Bhùird a' freagairt air riatanasan is stiùiridhean foghlaim nàiseanta.
- A' dèanamh cinnteach gu bheil Bòrd na Gàidhlig ag obair gu gnìomhach is ann an com-pàirt còmhla ri diofar phrìomh luchd-compàirt ann an raon foghlam na Gàidhlig airson dèanamh cinnteach gu bheil com-pàirteachasan buadh-mhor aig Bòrd na Gàidhlig agus gu bheil e a' toirt buaidh air co-dhùnaidhean a nithear a thaobh foghlaim aig ìre ionadail agus nàiseanta.

## Dleastanasan sònraichte

Tha an tuairisgeul obrach seo a' toirt seachad dealbh fharsaing den dreuchd aig an àm a chaidh ullachadh. Chan e liosta iomlan a th' ann le iomradh air gach seòrsa dleastanais a dh'fhaodadh a

bhith ann, agus thathar a' gabhail ris gum faodadh obraichean atharrachadh thairis air ùine. Mar sin, chan e sgrìobhainn chùmhnaidh a tha seo agus bidh aig an neach san dreuchd seo ri dleastanas sam bith eile a choileanadh, gu ìre fhreagarraich, a dh'fheumas iad gus adhbhar na h-obrach seo a choileanadh.

### Teisteanasan, Sgilean agus Eòlas

- Feumaidh ceum no co-dhiù trì bliadhna de dh'eòlas ann an raon an fhoghlaim a bhith aig tagraichean
- Feumaidh teisteanas Disclosure Scotland, a chaidh a thoirt dhaibh o chionn 12 mìos, a bhith aig tagraichean airson na dreuchd seo, no feumaidh e a bhith comasach dhaibh Teisteanas DS fhaotainn
- Feumaidh eòlas pearsanta nach beag a bhith aig tagraichean air foghlam is ionnsachadh na Gàidhlig, le eòlas is tuigse air stiùireadh is ceannas ann an roinn foghlaim ann an Alba.

Sgilean	Ìre ion-mhiannaichte
Bidh tuigse mhath agaibh air an àite a th' aig Bòrd na Gàidhlig ann an raon an ionnsachaidh is an fhoghlaim, agus ann an roinn phoblach na h-Alba san fharsaingeachd.	Riatanach
Comasach dhuibh ìrean coileanaidh àrda a stèidheachadh dhuibh fhèin agus do chàch, agus sibh gan stiùireadh, gam brosnachadh agus a' toirt chothroman leasachaidh dhaibh, feuch an coilean iad an obair aca gu ìre mhath agus gun coilean iad amasan is dleastanasan reachdail Bhòrd na Gàidhlig.	Riatanach
Fileanta ann an Gàidhlig is Beurla, gam bruidhinn agus gan sgrìobhadh.	Riatanach
Comasach dhuibh a bhith a' cur deagh mhodhan-riaghlaidh an sàs nur n-obair agus a bhith a' stiùireadh phròiseactan (m.e. clàran-ama, ionmhas, is goireasan eile) gus am bi iad air an libhrigeadh a rèir a' chlàir-ama is a' bhuidseit.	Riatanach
Comasach dhuibh fiosrachadh toinnte agus/no connspaideach a chur an cèill gu soilleir agus le misneachd ann an suidheachaidhean nàiseanta, ionadail agus aig ìre phearsanta.	Riatanach
Eòlas agaibh air a bhith a' planadh is a' toirt phrògraman-obrach gu buil far am feumar co-chonaltradh a dhèanamh ri grunn bhuidhnean is dhaoine le ùidh no com-pàirt sa phrògram.	Riatanach
Deagh sgilean agaibh a thaobh a bhith ag obair còmhla ri luchd-compàirt gus dèanamh cinnteach gun tèid pròiseactan is builean a choileanadh.	Riatanach
Eòlas agaibh air a bhith a' brosnachadh deagh mhodhan-obrach air feadh raon foghlam is ionnsachadh na Gàidhlig.	Riatanach
Eòlas agaibh air a bhith a' toirt comhairle is stiùireadh do bhuidhnean air gach cùis co-cheangailte ri ionnsachadh, a' gabhail a-steach buidhnean ionadail agus nàiseanta.	Riatanach

Eòlas agaibh air a bhith nur manaidsear os cionn dhaoine.	Na bhuannachd
Ag obair leis na meadhanan gus teachdaireachdan matha a thoirt seachad agus fios mu ar poileasaidhean is obair a sgaoileadh.	Na bhuannachd
Ball de Chomhairle Choitcheann Luchd-teagaisg na h-Alba (GTCS) no tha e comasach dhuibh ballrachd a thoirt a-mach san GTCS.	Na bhuannachd
Eòlas sònraichte air na tràth-irean / foghlaim Bun-sgoile	Na bhuannachd

### Sochairean

Bidh luchd-obrach le cùmhnantan maireannach, no cùmhnantan sealach a mhaireas 3 mìosan no nas fhaide, nam buill de Mhaoin Peinnsein Chomhairle na Gàidhealtachd, mura cuir iad a-steach airson tarraing a-mach. <http://www.hilandpensionfund.org>

Gheibhear 30 latha de shaor-làithean sa bhliadhna agus 7 latha de shaor-làithean poblach (Pro rata)

### Disclosure Scotland

Mar phàirt de Bhun-inbhean Tèarainteachd aig Riaghaltas na h-Alba, cuiridh Bòrd na Gàidhlig sgrùdadh **Disclosure Scotland** air dòigh airson a h-uile tagraiche soirbheachail.

### Eile

Mar as trice bidh luchd-inntrigidh ùr a' tòiseachadh air an ìre as ìsle den raon pàighidh le dreuchdan maireannach airidh air adhartas mean air mhean, le ùmhlachd do phoileasaidh Bòrd na Gàidhlig.

Dh'fhaodadh gum bi feum aig an dreuchd seo air siubhal bho àm gu àm a dh'fhaodadh a bhith a' gabhail a-steach a bhith a' cur seachad oidhcheannan air falbh bhon dachaigh..

Seo cunntas air an dreuchd mar a tha i an-dràsta. Tha e na chleachdadh àbhaisteach ath-sgrùdadh a dhèanamh air tuairisgeulan obrach bho àm gu àm gus dèanamh cinnteach gu bheil iad iomchaidh don obair làithrich, agus gus atharrachaidhean a chaidh a dhèanamh no a mholadh a nochdadh.

Airson tuilleadh fiosrachaidh mu Bhòrd na Gàidhlig, tadhailibh air an làraich-lìn againn [www.gaidhlig.scot](http://www.gaidhlig.scot).

